


悲
華
經



百三十五
食七

4813c



元祿九年丙子二月日重脩

皇圖環固 帝衢銀呂

佛日增輝 懋輪常轉

山城州天安寺法金剛院置



悲華經卷第七

北涼天竺三藏法師曇無讖譯

諸菩薩受記品第四之五

世尊我成阿耨多羅三藐三菩提已一音說法或有衆生學聲聞乘聞佛說法即得知聲聞法藏或有修學辟支佛乘聞佛說法便得解於辟支佛法或有修學無上大乘聞佛說法便得解了大乘之法純一無雜若有修集助菩提法欲得菩提聞佛說法即得捨財行於布施若有衆生離諸功德希求天上人中快樂聞佛說法即得持戒若有衆生互相怖畏有愛瞋心聞佛說法即得相於生親厚心

者若有衆生喜爲殺業聞佛說法即得悲心
若有衆生常爲慳恡嫉妬覆心聞佛說法即
修喜心若有衆生端正無病貪著於色心生
放逸聞佛說法即得捨心若有衆生婬欲熾
盛其心放逸聞佛說法即觀不淨若有衆生
學大乘者爲掉蓋所覆聞佛說法即得身念
處法若有衆生常自稱讚能大論議其智慧
明猶如拙電聞佛說法即解甚深十二因緣
若有衆生寡聞少見自稱能論聞佛說法即
得不奪不失諸陀羅尼若有衆生入邪見山
聞佛說法即解諸法甚深空門若有衆生諸
覺覆心聞佛說法即得深解無相法門若有

衆生諸不淨願覆蔽其心聞佛說法即得深
解無作法門若有衆生心不清淨聞佛說法
心得清淨若有衆生以多緣覆心聞佛說法
得解不失菩提心法若有衆生瞋恚覆心聞
佛說法解真實相得受記莵若有衆生依猗
覆心聞佛說法深解諸法無所依猗若有衆
生愛染覆心聞佛說法疾解諸法無垢清淨
若有衆生忘失善心聞佛說法深解日光三昧
若有衆生行諸魔業聞佛說法速得解了清
淨之法若有衆生邪論覆心聞佛說法即得
深解增益正法若有衆生煩惱覆心聞佛說
法速得解了離煩惱法若有衆生行諸惡道

聞佛說法即得迴反若有衆生於大乘法讚
說邪法以爲吉妙聞佛說法即於邪法生退
轉心而得正解若有菩薩厭於生死聞佛說
法即於生死心生愛樂若有衆生不知善地
聞佛說法即得覺了善地之法若有衆生見
他爲善不生好樂生於妬嫉聞佛說法即得
心喜若有衆生其心各各共相違反聞佛說
法即得無礙光明若有衆生行諸惡業聞佛
說法深解惡業所得果報若有衆生怖畏大
衆聞佛說法深得解了師子相三昧若有衆
生四魔覆心聞佛說法疾得首楞嚴三昧若
有衆生不見諸佛國土光明聞佛說法即得

深解種種莊嚴光明三昧若有衆生有憎愛
心聞佛說法即得捨心若有衆生未得佛法
光明聞佛說法即得法幢相三昧若有衆生
離大智慧聞佛說法即得法炬三昧若有衆
生癡暗覆心聞佛說法即得日燈光明三昧
若有衆生口無辯才聞佛說法即得種種功
德應辯若有衆生觀色和合無有堅固猶如
水沫聞佛說法即得那羅延三昧若有衆生
心亂不定聞佛說法即得堅牢決定三昧若
有衆生欲觀佛頂聞佛說法即得須弥幢三
昧若有衆生放捨本願聞佛說法即得堅牢
三昧若有衆生退失諸通聞佛說法即得金

剛三昧若有衆生於菩提場而生疑惑聞佛
說法即得了達金剛道場若有衆生一切佛
法中無厭離心聞佛說法即得金剛三昧若
有衆生不知他心聞佛說法即知他心若有
衆生於諸根中不知利鈍聞佛說法即知利
鈍若有衆生各各種類不相解語聞佛說法
即得解了音聲三昧若有衆生未得法身聞
佛說法即得解了分別諸身若有衆生不見
佛身聞佛說法即得不眴三昧若有衆生分
別諸緣聞佛說法即得無諍三昧若有衆生
於轉法輪心生疑惑聞佛說法於轉法輪得
心清淨若有衆生起無因邪行聞佛說法即

得法明隨順因緣若有衆生於一佛世界起
於常見聞佛說法即得善別無量佛土若有
衆生未種諸相善根聞佛說法即得種種莊
嚴三昧若有衆生不能善別一切言語聞佛
說法即得解了分別種種言音三昧若有衆
生專心求於一切智慧聞佛說法即得無所
分別法界三昧若有衆生退轉於法聞佛說
法即得堅固三昧若有衆生不知法界聞佛
說法即得大智慧若有衆生離本誓願聞佛
說法即得不失三昧若有衆生分別諸道聞
佛說法即得一道無所分別若有衆生推求
智慧欲同虛空聞佛說法即得無所有三昧

若有衆生未得具足諸波羅蜜聞佛說法即
得住於淨波羅蜜若有衆生未得具足四攝
之法聞佛說法即得妙善攝取三昧若有衆
生分別四無量心聞佛說法即得平等勤心
精進若有衆生未得具足三十七助菩提法
聞佛說法即得住不出世三昧若有衆生其
心失念及善智慧聞佛說法即得大海智印
三昧若有衆生其心疑惑未生法忍聞佛說
法即得諸法決定三昧以一法相故若有衆
生忘所聞法聞佛說法即得不失念三昧若
有衆生各各說法不相喜樂聞佛說法即得
清淨慧眼無有疑網若有衆生於三寶中不

生信心聞佛說法即得功德增長三昧若有
衆生渴乏之法雨聞佛說法即得法雨三昧若
有衆生於三寶中起斷滅見聞佛說法即得
諸寶莊嚴三昧若有衆生不作智業不勤精
進聞佛說法即得金剛智慧三昧若有衆生
爲諸煩惱之所繫縛聞佛說法即得虛空印
三昧若有衆生計我我所聞佛說法即得智
印三昧若有衆生不知如來具足功德聞佛
說法即得世間解脫三昧若有衆生於過去世
未供養佛聞佛說法即得種種神足變化若
有衆生一法界門於未來世無量劫中未得
說之聞佛說法即得解說一切請法同一法

界若有衆生於諸一切修多羅中未得選擇
聞佛說法即得諸法平等實相三昧若有衆
生離六和法聞佛說法即得解了諸法三昧
若有衆生於不可思議解脫法門不勤精進
聞佛說法於諸通中即得師子遊戲三昧若
有衆生欲分別入於如來藏聞佛說法更不
從他聞即得分別入如來藏若有衆生於菩
薩道不勤精進聞佛說法即得智慧勤行精
進若有衆生未曾得見今生經聞佛說法即
得一切在在處處三昧若有衆生行道未竟
聞佛說法即得受記三昧若有衆生未得具
足如來十力聞佛說法即得無壞三昧若有

衆生未得具足四無所畏聞佛說法即得無
盡意三昧若有衆生未得具足佛不共法聞
佛說法即得不共法三昧若有衆生未得具
足無愚癡見聞佛說法即得願句三昧若有
衆生未覺一切佛法之門聞佛說法即得鮮
白無垢淨印三昧若有衆生未具足一切智
聞佛說法即得善了三昧若有衆生未得成
就一切佛事聞佛說法即得無量不盡意三
昧如是等衆生於聞法中各得信解有諸菩
薩其心質直無有諂曲聞佛說法即得八万
四千諸法門八万四千諸三昧門七万五千
隨羅尼門有無量無邊阿僧祇菩薩摩訶薩

修習大乘者聞是說法亦得如是無量功德
安止住於不退轉地是故諸菩薩摩訶薩欲
得種種莊嚴堅牢故發不可思議願增益不
可思議知見以自莊嚴以三十二相莊嚴故
得八十隨形好以妙音莊嚴故隨諸衆生所
喜說法令聞法者滿足知見以心莊嚴故得
諸三昧不生退轉以念莊嚴故不失一切諸
陀羅尼以心莊嚴故得分別諸法以念莊嚴
故得解微塵等義以善心莊嚴故得堅固誓
願牢堅精進如其所願到於彼岸以專心莊
嚴故次第過住以布施莊嚴故於諸所須悉
能放捨以持戒莊嚴故令心善白清淨無垢

以忍辱莊嚴故於諸衆生心無障礙以精進
莊嚴故一切佐助悉得成就以禪定莊嚴故
於一切三昧中得師子遊戲以智慧莊嚴故
知諸煩惱習以慈莊嚴故專心念於一切衆
生以悲莊嚴故悉能拔出衆生之苦以喜莊
嚴故於一切法自悲華經心無疑惑以捨莊嚴故得離

憍慢心無高下以諸通莊嚴故於一切法得
師子遊戲以功德莊嚴故得不可盡藏寶手
以智莊嚴故知諸衆生所有諸心以意莊嚴
故方便醒悟一切衆生以光鬪莊嚴故得智
慧眼明以諸辯莊嚴故令衆生得法義應辭
以無畏莊嚴故一切諸魔不能留難以功德

莊嚴故得諸佛世尊所有功德以法莊嚴故
得無礙辯常為衆生演說妙法以光明莊嚴
故得一切佛法光明以照明莊嚴故能遍照
於諸佛世界以他心莊嚴故得正智無亂以
教誡莊嚴故得如所說護持禁戒以神足莊
嚴故得如意足到於彼岸以受持一切諸如
來莊嚴故得入如來無量法藏以尊法莊嚴
故得不隨他智慧以隨行一切善法莊嚴故
得如說而行欲令如是衆生悉得如是等功
德利益若有無量無邊阿僧祇菩薩摩訶薩
修集大乘以我說一句法故悉具如是白淨
善法皆使充足以是故諸菩薩摩訶薩於諸

法中所得智慧不從他聞得成就大法光明
成阿耨多羅三藐三菩提世尊若有衆生於
他方世界作五逆罪乃至犯四重禁燒滅善
法若學聲聞緣覺大乘以願力故欲來生我
世界既來生已復聚一切諸不善業麤朴弊
惡其心喜求強良難調專心四倒貪著慳悋
如是等衆生八万四千異性亂心我當爲其
各各異性廣說八萬四千法聚世尊若有衆
生學無上大乘我當爲其具足廣說六波羅
蜜所謂檀波羅蜜乃至般若波羅蜜若有衆
生學聲聞乘未種善根願求諸佛以爲其師
我當安止於三歸依然後勸令住六波羅蜜

若有衆生喜爲殺害我當安止於不殺中若有衆生專行貪惡我當安止於不盜中若有衆生非法邪淫我當安止不邪淫中若有衆生各各故作誹謗妄語我當安止不妄語中若有衆生樂爲狂癡我當安止不飲酒中若有衆生犯此五事我當令受優婆塞五戒若有一夜受持八戒若有衆生少於善根於善根中心生愛樂我當令其於未來世在佛法中出家學道安止令住梵淨十戒若有衆生希冀求於諸善根法我當安止善根法中令得成就梵行具足大戒如是等衆生作五逆罪

乃至慳悋爲是衆生以種種門示現神足說
諸句義開示陰界諸入苦空無常無我令住
善妙安隱寂滅無畏涅槃爲如是四衆比丘
比丘尼優婆塞優婆夷說法若有衆生求聞
論議我當說正法諸論乃至有求解脫之者
我當爲說空無之論若有衆生其心不樂於
正善法我當爲說營佐衆事若有衆生於正
善法其心愛樂我當爲說空三昧定示正解
脫世尊我爲如是一一衆生要當過於百千
由旬不以神足而以開示無量無邊種種方
便爲解句義示現神足乃至涅槃心不生厭
世尊我以三昧力故捨第五分所得壽命而

般涅槃我於是時自分其身如半亭歷子爲
憐愍衆生故求般涅槃般涅槃後所有正法
住世千歲像法住世滿五百歲我涅槃後若
有衆生以珍寶伎樂供養舍利乃至禮拜右
遶一匝合掌稱歎一莖華散以是因緣隨其
志願於三乘中各不退轉世尊我般涅槃後
若有衆生於我法中乃至一戒如我所說能
堅持之乃至讀誦一四句偈爲他人說令彼
聽者心生歡喜供養法師乃至一華一禮以
是因緣隨其志願於三乘中各不退轉乃至
法炬滅法幢倒正法滅已我之舍利尋沒於
地至金剛際尔時娑婆世界空無珍寶我之

舍利變爲意相瑠璃寶珠其明炎盛從金剛
際出於世間上至阿迦尼吒天雨種種華鬘
陀羅華摩訶曼陀羅華波利質多華曼殊沙
華摩訶曼殊沙華有淨光明大如車輪百葉
千葉或百千葉其光遍照亦有好香微妙常
敷觀者無厭其明炎盛不可稱計微妙之香
無量無邊純雨如是無量諸華當其雨時復
出種種微妙音聲佛聲法聲比丘僧聲三歸
依聲優婆塞戒聲成就八戒聲出家十戒聲
布施聲持戒聲清淨梵行具大戒聲助佐衆
事聲讀經聲禪思惟聲觀不淨聲念出入息
聲非想非非想聲有想無想聲識處聲空處

聲八勝處聲十一切入聲定慧聲空聲無相
聲無作聲十二緣聲具足聲聞藏聲學緣覺
聲具足大乘六波羅蜜聲於其華中出如是
等聲色界諸天皆悉聞之本昔所作諸善根
本各自憶念所有不善尋自悔責即便來下
娑婆世界教化世間無量衆生悉令得住於
十善中欲界諸天亦得聞受所有愛結貪喜
五欲諸心數法悉得寂靜本昔所作諸善根
本各自憶念所有不善尋自悔責即便來下
娑婆世界教化衆生無量衆生悉令得住於
十善中世尊如是諸華於虛空中復當化作
種種珍寶金銀摩尼真珠瑠璃珂貝璧玉真

寶偽寶馬瑙珊瑚天冠寶飾如雨而下一切
遍滿娑婆世界爾時人民其心和悅無諸鬪
諍飢餓疾病他方怨賊惡口諸毒一切消滅
皆得寂靜爾時世界有如是樂若有衆生見
諸珍寶若觸若用於三乘中無有退轉是諸
珍寶作是利益作利益已還沒於地至本住
處金剛地際世尊娑婆世界兵劫起時我身
舍利復當化作紺瑠璃珠從地而出上至阿
迦尼吒天雨種種華曼陀羅華摩訶曼陀羅
華波利質多華乃至還沒於地至本住處金
剛地際亦復如是世尊如刀兵劫飢餓疾疫
亦復如是世尊如是大賢劫中我般涅槃後

是諸舍利作如是佛事調伏無量無邊衆生
於三乘中得不退轉如是當於如五佛世界
微塵數等大劫之中調伏無量無邊衆生令
於三乘得不退轉卽尊若後滿千恒河沙等
阿僧祇劫於十方無量無邊阿僧祇餘世界
成佛出世者悉是我修阿耨多羅三藐三菩
提時所可教化初發阿耨多羅三藐三菩提
心安止令住六波羅蜜者卽尊我成阿耨多
羅三藐三菩提已所可勸化令發阿耨多羅
三藐三菩提心安止令住六波羅蜜及涅槃
後舍利變化所化衆生令發阿耨多羅三藐
三菩提心者是諸衆生過千恒河沙等阿僧

祇劫於十方無量無邊阿僧祇世界成佛出世皆當稱我名字而說讚歎過去久遠有劫名賢初入劫時第四世尊名曰某甲彼佛世尊勸化我等初發阿耨多羅三藐三菩提心我等今時燒滅善心集不善根作五逆罪乃至邪見彼佛今時勸化我等令得安住六波羅蜜因是即得解了一切陀羅尼門轉正法輪離生死縛令無量無邊百千衆生安住勝果復令無量百千衆生安止天人乃至解脫果若有衆生求菩提道聞讚歎我已各問於佛彼佛世尊見何義利於重五濁惡世之中成阿耨多羅三藐三菩提是諸世尊即便向

是求菩提道善男子善女人說我往昔所成
大悲初發阿耨多羅三藐三菩提心莊嚴世
界及妙善願本起因緣是人聞已其心驚愕
歎未曾有尋發妙願於諸衆生生大悲心如
我無異作是願言其有如是重五濁世其中
衆生作五逆罪乃至成就諸不善根我當於
中而調伏之彼諸世尊以是諸人成就大悲
於五濁世發諸善願隨其所求而與受記世
尊彼佛出世尊復爲修學大乘諸人說我舍利
所作變化本起因緣過去久遠有佛出世尊号
字某甲般涅槃後刀兵疾病飢餓劫起我等
亦時於其劫中受諸苦惱是佛舍利爲我等

故作種種神足師子遊戲是故我等即得發
阿耨多羅三藐三菩提心種諸善根精勤修
習於六波羅蜜如上廣說佛告寂意菩薩善
男子尔時寶海梵志在寶藏佛所諸天大衆
人非人前尋得成就大悲之心廣大無量作
五百誓願已復白佛言世尊若我所願不成
不得已利者我則不於未來賢劫重五濁惡
互相鬪諍末世盲癡無所師諮無有教誡墮
於諸見大黑暗中作五逆惡如上說中成就
所願作於佛事我今則捨菩提之心亦不願
於他方佛土殖諸善根世尊我今如是專心
不以是善根成阿耨多羅三藐三菩提亦不

願求辟支佛乘亦復不願作聲聞乘天主人
王貪樂五欲生天人中不求軋閻婆阿脩羅
迦樓羅緊那羅摩睺羅伽夜叉羅刹諸龍王
等以是善根不求如是諸處世尊若得大富
以施爲因若得生天以戒爲因若得大智以
廣學爲因若斷煩惱以思惟爲因如佛言曰
如是等事皆是已利功德之人則能隨其所
求皆悉得之世尊若我善根成就得已利者
我之所有布施持戒多聞思惟悉當成就以
是果報皆爲地獄一切衆生若有衆生墮阿
鼻地獄以是善根當拔濟之令生人中聞佛
說法即得開解成阿羅漢速入涅槃是諸衆

生若業報未盡我當捨壽入阿鼻獄代受苦
惱願令我身數如一佛世界微塵一一身如
須彌山等是一一身覺諸苦樂如我今身所
覺苦樂一一身受如一佛世界微塵數等種
種重惡苦惱之報如今一佛世界微塵數等
十方諸佛世界所有衆生作五逆惡起不善
業乃至當墮阿鼻地獄若後過如一佛世界
微塵等大劫十方諸佛世界微塵數等所有
衆生作五逆惡起不善業當墮阿鼻地獄者
我當爲是一切衆生於阿鼻地獄代受諸苦
令不墮地獄值遇諸佛諮受妙法出於生死
入涅槃城我今要當代是衆生久久處阿鼻

地獄復次如一佛世界微塵數等十方世界
所有衆生惡業成就當必定受果墮火炙地
獄如阿鼻地獄所說炙地獄摩訶盧獵地獄
盧臘地獄逼迫地獄黑繩地獄想地獄及種
種畜生餓鬼貧窮夜叉拘槃荼毗舍遮阿脩
羅迦樓羅等皆亦如是世尊若有如一佛世
界微塵數等十方世界所有衆生成就惡業
必當受報生於人中聾盲瘖瘂無手無脚心
亂失念食噉不淨我亦當代如是衆生受於
諸罪如上所說復次若有衆生墮阿鼻地獄
受諸苦惱我當久久代是衆生受於苦惱如
生死衆生所受陰界諸入畜生餓鬼貧窮夜

又拘辦茶毗舍遮阿脩羅迦樓羅等皆亦如是世尊若我所願成就逮得已利成阿耨多羅三藐三菩提如上所願者十方無量無邊阿僧祇世界在在處處現在諸佛為衆生說法悉當為我作證亦是諸佛之所知見世尊唯願今者與我阿耨多羅三藐三菩提記於賢劫中人壽百二十歲時成佛出世如來應供正遍知乃至天人師佛世尊世尊若我必能成就如是佛事如我之所願者今此大衆及諸天龍阿脩羅等若處地上虛空唯除如來其餘一切皆當涕泣悉於我前頭面作禮讚言善哉善哉大悲成就無能及也得念甚

深為諸衆生生是深悲發堅固誓願汝今所
作不由他教以專心大悲覆護一切攝取五
逆諸不善人汝之善願我今悉知汝初發阿
耨多羅三藐三菩提心時已為衆生作大良
藥為作歸依擁護舍宅為令衆生得解脫故
作是誓願汝今所願得已利者如來為汝授
阿耨多羅三藐三菩提記說是語已時轉輪
聖王無量清淨尋從座起悲泣淚出叉手合
掌向是梵志頭面敬禮而說偈言

汝今所願堅固甚深放捨已樂為諸衆生
起大悲心為我等現諸法真實妙勝之相
尔時觀世音菩薩說偈讚言

衆生多所著

汝今無所著

於上下諸根

久已得自在

故能隨衆生

根願具足與

未來世當得

陀羅尼智藏

尔時得大勢菩薩說偈讚言

無量億衆生

為善故集聚

見知汝大悲

一切皆啼泣

所作諸苦行

皆來未曾有

尔時文殊師利菩薩復說偈讚言

精進三昧

甚堅牢固

妙勝智慧

善能分別

若以香華

供養汝者

汝於今日

則能堪受

尔時虛空印菩薩復說偈讚言

汝為衆生成就大悲

捨財布施

於濁惡世

嚴持諸相微妙第一

為諸天人

作調御師

尔時金剛智慧光。明菩薩復說偈讚言。
汝今大悲心。廣大如虛空。欲為衆生親。
故現行菩提。

尔時虛空日菩薩復說偈讚言。
汝所成就大悲功德。勝妙智慧。善別法相。
除佛世尊。餘無能及。

尔時師子香菩薩復說偈讚言。

汝於來世。於賢劫中。多煩惱處。得大名稱。
復令無量諸衆生等。斷除苦惱。得妙解脫。
尔時普賢菩薩復說偈讚言。

一切衆生。勤心修習。生死飢餓。涉邪見山。
牙相食噉。無有善心。汝以大悲。故能攝取。

尔時阿闍菩薩復說偈讚言

燒滅善心專作逆惡墮大無明黑暗之中
無由得出煩惱淤泥汝已攝取如是衆生

尔時香手菩薩復說偈讚言

汝今審見未來之出多諸恐怖如觀鏡像
其中衆生毀壞正法皆悉燒滅一切善心

尔時寶相菩薩復說偈讚言

汝今純以智慧持戒三昧慈悲莊嚴其心
故能攝取燒滅善法誹謗聖人如是衆生

尔時離恐怖莊嚴菩薩復說偈讚言

汝今所修無量苦行皆為攝取當來衆生
燒滅善心依邪見者

尔時華手菩薩復說偈讚言

汝今大悲智慧精進於此大衆無能及者
是故攝取邪見諸心為老病死之所逼者
尔時智稱菩薩復說偈讚言

無量衆生多諸病苦常為煩惱惡風所吹
汝今能以大智慧水消滅諸魔破其力勢
尔時地印菩薩復說偈讚言

汝今已有堅固精進能盡煩惱而得解脫
我等志薄不能及是

尔時月華菩薩復說偈讚言

堅固修習精進用意依止功德生憐愍心
是故來世能為衆生斷於三世三有結縛

尔時無垢月菩薩復說偈讚言

菩薩所行道 大悲為最上 所說非相立

是故我稽首

尔時持力菩薩復說偈讚言

五濁惡世多煩惱病 汝依菩提發堅固願
為諸衆生斷煩惱根

尔時火鬘菩薩復說偈讚言

汝之智慧猶如寶藏所發誓願 清淨無垢
所可修行無上菩提 但為衆生作大醫王
尔時現力菩薩悲泣涕淚在梵志前頭面作
禮合掌叉手說偈讚曰

汝今以此大智慧炬 為諸衆生斷煩惱病

亦爲貧窮空乏衆生斷除一切無量諸苦
善男子尔時一切大衆天龍鬼神卽闍婆人
及非人在梵志前頭面作禮禮已起立合掌
恭敬以種種讚法而讚歎之

佛告寂意菩薩善男子尔時寶海梵志於如
來前右膝著地是時大地六種震動一切十
方如一佛世界微塵數等諸佛世界亦六種
振動有大光明遍照世間兩種種華曼陀羅
華摩訶曼陀羅華波梨質多華曼殊沙華摩
訶曼殊沙華乃至有無量光明遍照十方如
一佛世界微塵等若淨不淨諸世界中在在
處處現在諸佛爲諸衆生說於正法是諸佛

所各有菩薩坐而聽法。是諸菩薩見此大地
六種震動放大光明。兩種種種華見。是事已前
白佛言。世尊。何因緣故。而此大地六種震動
有大光明。兩種種種華。尔時東方去此一恒河
沙等有佛。世界名選擇珍寶。是中有佛号寶
月如來。應正遍知。明行足。善逝。世間解。無上
士。調御丈夫。天人師。佛。世尊。今現在與無量
無邊阿僧祇等諸大菩薩恭敬圍遶。說大乘
法。有二菩薩一名寶相。二名月相。向寶月佛
合掌恭敬。而白佛言。世尊。何因緣故。地六種
動。有大光明。兩種種種華。尔時彼佛告二菩薩
善男子。西方去此如一恒河沙等。彼有世界。

名刪提嵐有佛世尊号曰寶藏如來乃至佛
世尊今現在與無量無邊諸菩薩等授阿耨
多羅三藐三菩提記說諸國土開示諸佛所
有世界莊嚴善願三昧境界陀羅尼門如是
等經彼大會中有一大悲菩薩摩訶薩作如
是願我今當以大悲熏心受阿耨多羅三藐
三菩提記為諸菩薩摩訶薩故示現善願是
以光令無量無邊諸菩薩等發大誓願取於
種種莊嚴世界調伏衆生是菩薩所成大悲
於諸大衆無能及者於五濁世調伏弊惡多
煩惱者攝取一切五逆之人乃至集聚諸不
善根燒滅善心彼諸大衆天龍鬼神人及非

人不供養佛悉共供養最後成就大悲菩薩
頭面禮已起立恭敬合掌說偈讚歎是時大
悲菩薩在於佛前右腓著地聽佛受記彼佛
世尊即便微笑以是因緣令此十方如一佛
刹微塵數等諸世界地六種震動放大光明
兩種種種華醒悟一切諸菩薩等亦復示現諸
菩薩道彼佛世尊悉令十方如一佛刹微塵
數等諸菩薩皆共集會為如是等諸大菩薩
說諸三昧陀羅尼門無畏法門是故彼佛示
現如是種種變化善男子時二菩薩聞是事
已即白佛言世尊是大悲菩薩發心以來為
經幾時行菩薩道復齊幾時何時當於五濁

惡世調伏攝取厚重煩惱互共鬪諍多作五
逆成就一切諸不善根燒滅善心如是一衆生
尔時彼佛告二菩薩善男子是大悲菩薩今
日初發阿耨多羅三藐三菩提心善男子汝
今可往見寶藏佛恭敬供養禮拜圍遶聽說
三昧陀羅尼門無畏法門如是等經并見大
悲菩薩摩訶薩汝以我聲作如是言寶月如
來致意問訊以此月光淨華作信與汝又讚
汝言善哉善哉善男子汝初發心已能成就
如是大悲汝今已有無量名稱遍滿十方如
一佛刹微塵數等諸佛世界皆言大悲菩薩
始初發心已能成就如是大悲是故善男子

我今讚汝善哉善哉復次善男子汝為當來
諸菩薩等成就大悲故說是大悲不斷善願
豎立法幢是故復讚善哉善哉復次善男子
汝之名稱未來世住當如一佛刹微塵數等
阿僧祇劫教百千億無量無邊阿僧祇衆生
安止令住阿耨多羅三藐三菩提至於佛所
得不退轉或發善願或取淨土攝取衆生隨
而調伏復令未來得受阿耨多羅三藐三菩
提記如是衆生於未來世過如一佛刹微塵
數劫當於十方如一佛刹微塵等諸佛世界
成阿耨多羅三藐三菩提轉正法輪復當讚
歎大悲菩薩是故以此三讚歎法讚歎於汝

善哉善哉善男子。尔時彼土有九十二億諸
菩薩摩訶薩，異口同聲作如是言：世尊，我等
欲往刪提嵐界，見寶藏佛，禮拜供養恭敬圍
遶，聽諸三昧陀羅尼門，無畏法門，如是等經
并欲見於大悲菩薩。尔時彼佛以此三讚歎
法及月光淨華與二菩薩而告之曰：宜知是
時。尔時寶相菩薩、月相菩薩於彼佛所取月
光淨華，并與九十二億菩薩摩訶薩。發彼世
界如電光，發沒彼即到刪提嵐刹閻浮提園
中寶藏佛所。到佛所已，頭面禮足，以諸菩薩
所得種種師子遊戲供養佛已，見寶海梵志
爲此大衆所共恭敬，合掌讚歎見是事已，即

便思惟今此大士或當即是大悲菩薩是故
能令寶月如來送此寶華是二菩薩尋於佛
前旋向梵志即以華與作如是言寶月如來
以此妙華與汝為信并三讚法如上所說如
是東方無量無邊阿僧祇諸佛世界亦遣無
量菩薩摩訶薩至刪提嵐界皆以月光淨塗

三讚歎法餘如上說善男子余時南方去此
七万七千百千億佛世界有佛世界名寶樓
師子吼有佛号師子吼相尊王如來應正遍
知明行足善逝世間解無上士調御丈夫天
人師佛世尊今現在為諸菩薩說大乘法有
二菩薩摩訶薩一名金剛智相二名師子金

剛相是二菩薩白佛言世尊何因緣故地六
種動有大光明兩種種華皆如東方諸菩薩
比復次南方無量無邊諸佛遣無量菩薩至
刪提嵐界亦如是今時西方去此八万九千
百千億世界有世界名安樂有佛号攝諸
根淨目如來今現在為四部眾說三乘法有
二菩薩一名賢日光明二名師子吼身是二
菩薩白佛言世尊何因緣故地六種動有大
光明兩種種華餘如上說如是西方無量世
界亦復如是今時北方過九万百千億世界
彼有世界名勝真實有佛号世間尊王如來
今現在為諸菩薩說大乘法有二菩薩一名

不動住二名得智慧世間尊王是二菩薩曰
佛言世尊何因緣故地六種動餘如上說北
方無量世界亦如是尔時下方過九万八千
百千億那由他有世界名離暗霧有佛号離
恐怖圍遶音今現在為四部眾說三乘法有
二菩薩一名日尊二名虛空日是二菩薩白
佛言此因緣故地六種動餘如上說下
方世界亦復如是

悲華經卷第七

食

拙電上正作制受樂上或作愛驚愕吾各盧

獵反良黑繩反食陵訊音信

尺誤反
涉
訊

